

(١١)

بعشق حاجات

بعشق حاجات

مهيش كتير

طلّة دفا

من شمس حانية مؤلّفة

داخلة تططب من ورا شباك إزاز

وسط الغيوم وسط المطر والزمهير

وصوت حرير

غنوة لفيروز أو أغاني قديمة جاز

كرسى فوتيه

جرنان معاه سيجارة و كمان فنجان لاتيه

يسحرنا عالم الشجن و الذكريات

بعشق حاجات

نسمة خريف

مرت شهور الحر المطفى بزيف

و طفلة رايحة المدرسة

واحدة معاه عمر لسه بيتدي

و ضفيرة و فيونكة و شنطة كراسات

سابتها قاصدة و لانا سية

كراس موسيقى و ياّ علبة ألوانات

بعشق حاجات

لحظة ميلاد

و تحيا مصر فى مدرسة بصوت الولاد

ساعة الشروق

و حوار بذوق

عن شعب طيب مستكين

و حلم إنه يجيله يوم يصحى يفوق

وأذان بيعلى إن العمل خير م السُّبات

حيّ على بلادنا وحيّ على العباد

حيّ على الحاضر وبكرة

الماضى فات ... الماضى مات

بعشق حاجات

ساعة الفطار

عيلة ولقمة مغمسة بحلم النهار

سينما وكتاب

ضحكة عجوز

نظرة رضا فى عين فقير

و لُقا السِّرير

لمَّة صحابى مهما طالت بالساعات

بعشق حاجات

كرسى فى جنينة ... واتنين سوا

بيسر قوا.....

لحظات هنا فى وسط مشوار الشقا و حياة ضنينة

الشعر شايب و الزمن سايب رتوش

عشرة و وفا باينة فى عيونهم و الوشوش

بعشق حاجات

مهيش كثير

أشياء بسيطة صغيرة

لكن أكيد فيها حاجات متكررة

عند الصغير و الكبير

لكن ف زحمة يومنا و ف جرى الساعات

بتضيع حاجات

وتتوه حاجات
وف لحظة نهدى ونفتكر
إن الحياة دى عمرها ما تكون حياة
إلا فى لحظة نحسها ... ونحبها
هتجيلنا ولا نروح لها
ولأ يضيع العمر نحلم باللقا
ومن سُكات
نعشق حاجات

القاهرة ٢٠١٠/١/١١

